

dr. sc. Boris Avdić, docent Univerziteta u Sarajevu – Prirodno-matematičkog fakulteta, uže naučne oblasti: "Regionalna geografija" i "Geografija u obrazovanju", predsjednik;

dr. sc. Zoran Curić, redoviti profesor u trajnom zvanju Sveučilišta u Zagrebu – Prirodoslovno-matematičkog fakulteta, polja interesovanja: "Regionalna geografija" i "Metodika geografije", član;

dr. sc. Ranko Mirić, redovni profesor Univerziteta u Sarajevu – Prirodno-matematičkog fakulteta, uže naučne oblasti: "Regionalna geografija" i "Turizam", član.

## **VIJEĆU UNIVERZITETA U SARAJEVU – PRIRODNO-MATEMATIČKI FAKULTET**

**Predmet:** Izbor SARADNIKA u zvanje VIŠEG ASISTENTA za oblast "Geografija u obrazovanju" na Univerzitetu u Sarajevu – Prirodno-matematički fakultet, Odsjek za geografiju – 1 izvršilac sa punim radnim vremenom

Na osnovu člana 69. stav (1) tačka f) i člana 123. Zakona o visokom obrazovanju (Službene novine Kantona Sarajevo, broj: 36/22 i 28/25), člana 111. tačka i) i 236. Statuta Univerziteta u Sarajevu, a u skladu sa Odlukom Vijeća Univerziteta u Sarajevu – Prirodno-matematičkog fakulteta broj 01/06-228/2-2022, te na prijedlog Vijeća Odsjeka za geografiju od 26. 11. 2025. godine, Vijeće Univerziteta u Sarajevu – Prirodno-matematičkog fakulteta na 25. elektronskoj sjednici održanoj 27. 11. 2025. godine, donijelo je odluku broj 01/06-2773/2-2025 od 27. 11. 2025. godine, kojom smo imenovani u Komisiju za pripremanje prijedloga za izbor SARADNIKA u zvanje VIŠEG ASISTENTA za oblast Geografija u obrazovanju, na Univerzitetu u Sarajevu – Prirodno-matematičkom fakultetu, Odsjek za geografiju - 1 izvršilac sa punim radnim vremenom.

Na osnovu uvida u dostavljenu dokumentaciju podnosimo sljedeći

### **IZVJEŠTAJ**

Na raspisani Konkurs objavljen 07. 11. 2025. godine u dnevnom listu Dnevni avaz, na web stranici Fakulteta i web stranici Univerziteta u Sarajevu, za radno mjesto SARADNIKA u zvanje VIŠEG ASISTENTA za oblasti Regionalna geografija i Geografija u obrazovanju, na Univerzitetu u Sarajevu – Prirodno-matematičkom fakultetu, Odsjek za geografiju – 1 izvršilac sa punim radnim vremenom, prijavila se Belma Durmišević, magistrica geografije i asistentica na Univerzitetu u Sarajevu - Prirodno-matematičkom fakultetu, Odsjek za geografiju, kao jedina kandidatkinja. Potvrdom broj 02/01-2726/2-2025 od 28. 11. 2025. godine, obaviješteni smo od strane Komisije za prijem pristiglih prijava da je prijava **Mr Belme Durmišević** blagovremena i potpuna u skladu sa uslovima utvrđenim Konkursom.

Uz prijavu na Konkurs, Mr Belma Durmišević je priložila sljedeće dokumente:

- Biografiju;
- Ovjerenu kopiju izvoda iz matične knjige rođenih i uvjerenja o državljanstvu;
- Ovjerene kopije diploma I i II ciklusa studija;
- Ovjerene kopije dodatka diplomama I i II ciklusa studija;
- Ovjerene kopije posebnog priznanja Srebrna značka Univerziteta u Sarajevu za I te I i II ciklus studija;
- Ovjerenu kopiju dokaza o provedenom izbornom periodu u zvanju asistenta za oblasti "Regionalna geografija" i "Geografija u obrazovanju";
- Ovjerene kopije uvjerenja o ostvarenom radnom stažu u osnovnim školama;
- Ovjerene kopije certifikata kojim se potvrđuje poznavanje engleskog jezika, nivo B2 Upper-Intermediate i osnova rada na računaru;
- Ovjerenu kopiju certifikata o učešću u TRAIN (Training & Research for Academic Newcomers) programu Univerziteta u Sarajevu;
- Ovjerenu kopiju potvrde o učestvovanju u realizaciji naučnoistraživačkog projekta;
- Dokaze o učešću u radu organizacionih odbora naučnih skupova;
- Dokaze o učešću u radu Geografskog društva u Federaciji Bosne i Hercegovine;
- Dokaze o učešću u radu komisija;
- Kopiju potvrde o recenzentskom angažmanu;
- Kopije i ovjerene kopije certifikata o stručnom usavršavanju – učešću u konferencijama, radionicama, seminarima, naučnim skupovima;
- Bibliografiju za naučnu oblast Geografija u obrazovanju s relevantnom dokumentacijom za izbor (naučni radovi, apstrakti, poglavlje u knjizi, praktikum) u printanoj i elektronskoj formi.

## **1. BIOGRAFSKI PODACI KANDIDATA**

Belma Durmišević je rođena 12. 05. 1996. godine u Sarajevu. Posjeduje državljanstvo Bosne i Hercegovine, a pored maternjeg bosanskog, aktivni je govornik i engleskog jezika (certificirani B2 nivo). Posjeduje kompjuterske vještine korištenja Microsoft Windows i Office paketa, zatim Interneta i digitalne komunikacije, ArcGIS softvera, virtuelnog globusa Google Earth itd, što je potvrđeno dostavljenim certifikatima završenih edukativnih kurseva.

### **1.1. Obrazovanje i stručno usavršavanje**

Na osnovu biografije, priloženih diploma i dodatnih priloženih potvrda, evidentiran je ovakav vremenski slijed napredovanja u akademskom obrazovanju kandidata:

2015. godine – uspješno završena Treća gimnazija u Sarajevu;

2019. godine – bakalaureat geografije (završen I ciklus Nastavničkog smjera geografije na Univerzitet u Sarajevu – Prirodno-matematički fakultet);

2020. godine – magistar geografije (završen II ciklus Nastavničkog smjera geografije na Univerzitet u Sarajevu – Prirodno-matematički fakultet);

2022. godine – upisan doktorski studij (III ciklus) ‘Prirodne i matematičke nauke u obrazovanju – Geografija u obrazovanju’ na Univerzitetu u Sarajevu – Prirodno-matematički fakultet;

2024. godine – uspješno odbranjen projekat doktorske disertacije pod naslovom ‘Primjena proširene i virtuelne realnosti u regionalnim sadržajima u srednjoškolskoj nastavi geografije’.

Kandidatkinja je trenutno studentica V semestra III ciklusa pomenutog dokorskog studija.

Na osnovu priloženih certifikata, evidentirano je da je kandidatkinja uspješno završila i brojne programe stručnog usavršavanja, uključujući: WWF-u ‘Obuku za edukatore i edukatorke za sprovođenje aktivnosti u prirodi’, TRAIN program, trening ‘Asistivna tehnologija u funkciji unapređenja kvalitete podučavanja i studiranja’, IOM radionice, samit ‘Otpornost i inovacije u sektoru turizma’ i putovanja, ljetnu školu ‘Environmental History and Historical Ecology of the Dinaric Karst’ i dr.

## **1.2. Radno iskustvo**

Na osnovu dostavljene biografije i drugih dokumenata, evidentiran je ovakav vremenski slijed kretanja u zaposlenju:

2021. godine: nastavnica geografije u OŠ Osman Nuri Hadžić i OŠ Meša Selimović;

2022. godine – danas: asistentica na oblastima Regionalna geografija i Geografija u obrazovanju na Univerzitetu u Sarajevu – Prirodno-matematičkom fakultetu;

Pored formalnog radnog iskustva, kandidatkinja je bila edukator za korištenje Internet tehnologije u okviru projekta ‘Unapređivanje kvaliteta života osoba sa intelektualnim teškoćama’ u Udruženju za podršku osobama sa intelektualnim teškoćama na području Kantona Sarajevo OAZA, gdje je ujedno i volontirala, što je potvrđeno ovjerenom kopijom Ugovora o djelu..

## **1.3. Nagrade i priznanja**

Kandidatkinja je dobitnica posebnog priznanja Srebrna značka Univerziteta u Sarajevu za I ciklus studija Prirodno-matematičkog fakulteta Univerziteta u Sarajevu (2019. godine) i Srebrna značka Univerziteta u Sarajevu za I i II ciklus studija (2020. godine).

## **1.4. Institucionalni i društveni doprinos**

Zvanična dokumentacija koju je dostavila kandidatkinja pruža evidenciju u njen angažman u različitim aktivnostima na visokoškolskoj instituciji na kojoj je trenutno zaposlena (Univerzitet u Sarajevu – Prirodno-matematički fakultet), ali i u širem obrazovnom i naučnom kontekstu.

- članica organizacionih odbora većeg broja međunarodnih i domaćih konferencija: Demographic Challenges in Bosnia and Herzegovina and the World (2023. godine), Prvi

sajam sporta, zdravlja i turizma (2023. godine) 9<sup>th</sup>, 10<sup>th</sup> i 11<sup>th</sup> International Tourism and Hospitality Management Congress (2023, 2024. i 2025. godine), Small State Geopolitics in a Multipolar World – International conference & workshop (2024. godine) i Šesti kongres geografa Bosne i Hercegovine (2024. godine);

- članica Uredničkog odbora časopisa Geografski pregled u izdanju Univerziteta u Sarajevu – Prirodno-matematički fakultet, Odsjek za geografiju i Geografskog društva u Federaciji Bosne i Hercegovine (od 2024. godine)
- članica Odbora za osiguranje kvaliteta Univerziteta u Sarajevu – Prirodno-matematičkog fakulteta (od 2024. godine)
- članica Komisije za rangiranje kandidata za upis u prvu godinu II ciklusa studija na Odsjeku za geografiju Univerziteta u Sarajevu – Prirodno-matematičkog fakulteta (2024. i 2025. godine);
- predstavnica studenata III ciklusa studija u Vijeću Univerziteta u Sarajevu – Prirodno-matematički fakultet za ak. 2022/23. godinu;
- članica Nadzornog odbora Geografskog društva u Federaciji Bosne i Hercegovini (od 2025. godine);
- članica Komisija za izradu takmičarskih testova za učenike IX razreda osnovnih škola i za učenike od I do IV razreda srednje škole (gimnazija) sa područja Kantona Sarajevo na općinskom i kantonalnom nivou u šk. 2023/24. i 2024/25. godini.

## 2. NAUČNO-ISTRAŽIVAČKI I STRUČNI RAD KANDIDATA

### 2.1. Naučni radovi i druge recenzirane publikacije do izbora u prethodno zvanje

1. Nezirović, S. & **Durmišević, B.** (2021). Geographical Characteristics of the Una-Sana Mesoregion. *Revija za geografiju*, 31, 16(1), 57-76. <https://doi.org/10.18690/rg.16.1.3223>

Savremena regionalizacija Bosne i Hercegovine, koja razlikuje četiri makroregije (Peripanonsku, Planinsko-kotlinsku, makroregiju bosanskohercegovačkog visokog krša i Mediteransku), predstavlja važan okvir za razumijevanje prostorne diferencijacije zemlje u geografskom obrazovanju. U radu je poseban fokus stavljen na Unsko-sansku mezoregiju kao dio Peripanonske makroregije, pri čemu su analizirane njene osnovne prirodnogeografske odlike (geografski položaj, geološka i geomorfološka struktura, hidrogeografija, klima, pedološka i biogeografska obilježja), kao i ključni društvenogeografski pokazatelji (demografske karakteristike, struktura stanovništva i privredne funkcije). Na osnovu dostupnih statističkih izvora i terenskih opažanja, ukazuje se i na savremene razvojne probleme ove mezoregije, naročito negativne demografske trendove i izraženu emigraciju, što Unsko-sansku mezoregiju čini relevantnim primjerom za proučavanje regionalnih dispariteta u nastavi geografije.

2. Nezirović, S., **Durmišević, B.**, Hodžić, A. & Živko, A. (2021). Bosnia and Herzegovina – Transit Area or Unwanted Migrant Depots? *Revue Roumaine de Géographie / Romanian Journal of Geography*, 65(1), 3-19

Autorice analiziraju migrantske rute kojima se stanovništvo iz ratom zahvaćenih i ekonomski nerazvijenih područja Bliskog istoka, Južne Azije i Afrike kreće prema Evropi, te tumače uzroke i prostorne posljedice migrantske krize u Bosni i Hercegovini. Posebna pažnja posvećena je ulozi Bosne i Hercegovine kao tranzitnog prostora u savremenim migracijskim tokovima, koja je od 2016. godine, a naročito nakon 2018, postala neplanirana migrantska destinacija. U radu se ističu ključni problemi s kojima se država suočava, poput nedovoljnih smještajnih kapaciteta i složenog političko-administrativnog sistema, te se razmatraju mogući odgovori na ove izazove. Ovakav pristup omogućava učenicima i studentima geografije da kroz konkretan regionalni primjer razumiju uzroke, dinamiku i prostorni uticaj savremenih migracija, kao jednog od globalnih demografskih procesa.

## 2.2. Naučni radovi i druge recenzirane publikacije nakon izbora u prethodno zvanje

1. Nezirović, S., Aganović, Dž. & **Durmišević, B.** (2022). The Impact of the COVID-19 Pandemic on Tourism in the City of Sarajevo (Bosnia and Herzegovina). *Revue Roumaine de Géographie/Romanian Journal of Geography*, 66(2), 167-177.

Rad istražuje uticaj pandemije COVID-19 na turizam u Sarajevu, sagledavajući stanje turističke ponude prije pandemije, neposredne efekte te dugoročne posljedice na prostornu i socio-ekonomsku dinamiku grada. Analiza pokazuje da je turizam jedan od najosjetljivijih sektora, a pandemija je značajno utjecala na turističku aktivnost, ne samo u ekonomskom smislu, već i na psihološko stanje i ponašanje zaposlenih u sektoru. Cilj rada je prikazati prostorne i društvene posljedice pandemije na turistički promet u Sarajevu, ističući važnost održivog planiranja, prilagodbe turističke infrastrukture i razvijanja strategija oporavka u kontekstu urbanog i regionalnog razvoja.

2. Drešković, N., Hrelja, E., Osmanović, M. & **Durmišević, B.** (2022). Identification and Valorization of Tourist Motives - Case Study of the Old Town of Dubrovnik in Ilijaš. *Journal of Tourism and Hospitality Management*, 8, 108-125. <https://doi.org/10.35666/25662880.2022.8.108>

Predmet ovog istraživanja je identifikacija i prostorna valorizacija turističkih motiva Starog grada Dubrovnika unutar općine Ilijaš. Turistički motivi, kao ključni element turističkog sistema, analizirani su kroz osnovne komponente turističke valorizacije: lokaciju, atraktivnost, ambijent, izgrađenost i usklađenost s okolinom. Cilj je prikazati prostornu i funkcionalnu turističku vrijednost Starog grada te predložiti smjernice za prostorno planiranje i unapređenje turističkog razvoja. Istraživanje se temelji na kombinaciji terenskog rada, GIS analiza i savremenih evaluacijskih metoda, pri čemu su uzete u obzir i fizičkogeografske i društvenogeografske karakteristike područja, čime se naglašava važnost geografskog pristupa u planiranju i održivom razvoju turizma.

3. Nezirović, S., Živko, A., **Durmišević, B.** & Hodžić, A. (2022). Stabilisation and Association Agreement Between the Western Balkan Countries and the European Union. *Journal of Geography, Political and Society*, 12(2), 36-50. <https://doi.org/10.26881/jpgs.2022.2.05>

Rad istražuje Evropsku uniju (EU) kao savez suverenih država, naglašavajući njen značaj za regionalnu i globalnu konkurentnost, prostornu povezanost i međudržavnu saradnju. Posebna pažnja posvećena je procesu proširenja EU, s osvrtom na peto proširenje koje je simbolizovalo ujedinjenje Istočne i Zapadne Evrope, kao i očekivano buduće proširenje kroz članstvo država Zapadnog Balkana. Autorice prikazuju Proces stabilizacije i pridruživanja (SAP) i Sporazum o stabilizaciji i pridruživanju (SAA) kao ključne instrumente za političku, ekonomsku i prostornu integraciju regije. Rad analizira napredak zemalja Zapadnog Balkana ka članstvu, njihovu geopolitičku poziciju, prostorne i društvene izazove, te ulogu SAP-a i SAA u olakšavanju procesa pridruživanja i regionalnog povezivanja.

4. **Durmišević, B.**, Osmanović, M. & Nezirović, S. (2022). Regional-geographic Concept of the Development of Tourism in the Una-Sana Mesoregion. *Geografski pregled*, 46, 87- 102. <https://doi.org/10.35666/23038950.2022.46.87>

U ovom radu autorice proučavaju Unsko-sansku mezoregiju, dio Peripanonske makroregije, kroz prizmu njenih najvažnijih prirodnogeografskih i društvenogeografskih karakteristika. Posebna pažnja posvećena je identifikaciji manje poznatih turističkih motiva koji predstavljaju potencijal za razvoj turizma u regiji. Cilj istraživanja je pružiti pregled stvarnog stanja ovih motiva kroz analizu elemenata turističke valorizacije, uključujući prostornu lokaciju, povezanost s okolinom i stepen izgrađenosti. Autorice također formulišu smjernice za unapređenje ukupne turističke vrijednosti. Korištenje terenskog rada i savremenih geoinformacionih tehnologija omogućava objektivniji uvid u prostorni raspored i trenutni nivo turističkog razvoja, što učenicima i studentima geografije pruža primjer praktične primjene geografskih metoda u analizi turističkih resursa i regionalnog planiranja.

5. Banda, A., Peštek, A., Osmanović, M. & **Durmišević, B.** (2023). Will You Be Hungry in Sarajevo? A Tripadvisor Content Analysis of Local Gastro Offer in Sarajevo. *Journal of Tourism and Hospitality Management*, 9, 80-93. <https://doi.org/10.35666/25662880.2023.9.80>

Sarajevo je prepoznato kao turistička destinacija koja spaja kulturu, historiju i tradiciju, što se ogleda i u njenoj gastro ponudi. Grad nudi raznovrsne lokalne i međunarodne kuhinje, pružajući turistima jedinstvena iskustva. Ovaj rad analizira TripAdvisor recenzije restorana lokalne kuhinje, sistematski kategorizirajući različite aspekte ponude, uključujući tip restorana, kuhinje i ograničenja. Rezultati pružaju uvid u iskustva turista prilikom konzumiranja hrane, kvalitet i raznovrsnost gastronomske ponude, te mogu poslužiti kao osnova za unapređenje ugostiteljske i turističke ponude Sarajeva.

6. Nezirović, S. i **Durmišević, B.** (2023). *Praktikum iz Regionalne geografije II* [CD]. Sarajevo: Univerzitet u Sarajevu – Prirodno-matematički fakultet. ISBN 978-9926-453-73-2

Praktikum je razvijen u skladu s Nastavnim planom i programom studija geografije na Prirodno-matematičkom fakultetu Univerziteta u Sarajevu. Njegov primarni cilj je studentima olakšati savladavanje vježbi iz predmeta Regionalna geografija Bosne i Hercegovine II, pružajući

strukturiran i praktičan pristup učenju. Sadržaj je organizovan prema redoslijedu nastavnih jedinica i temelji se na dugogodišnjem iskustvu autorica u obrazovanju iz geografije. Materijal u potpunosti pokriva program vježbi i omogućava studentima samostalan rad, istovremeno produbljujući njihovo razumijevanje regionalnih geografskih fenomena. Svako poglavlje uključuje kratak teorijski uvod i jasna uputstva za praktične zadatke, čime se osigurava aktivno učenje i primjena geografskih metoda u analizi prostora i regionalnih procesa.

7. Žunić, L., Avdić, B., Žunić, F., **Durmišević, B.**, Žunić, F. (2024). Pristupačni turizam. *Zemlja i ljudi*, 74, 81-94.

Pristupačni turizam podrazumijeva prilagođavanje turističkih sadržaja i usluga osobama sa invaliditetom, starijim osobama i svim osobama kojima je potrebna posebna podrška. Rad analizira različite vrste invaliditeta, prostorne i infrastrukturne prepreke s kojima se korisnici susreću tokom putovanja te ističe značaj univerzalnog dizajna u turističkoj ponudi. Naglašava se rast ovog tržišta na globalnom nivou, kao i potreba za edukacijom turističkog osoblja, prilagođenom infrastrukturu i dostupnim informacijama. U geografskom obrazovanju ova tema omogućava proučavanje prostora u funkciji inkluzivnog razvoja turizma, socijalne dostupnosti destinacija i regionalne razlike u implementaciji pristupačnih usluga.

8. Banda, A., Osmanović, M., **Durmišević, B.**, Čaušević, A. & Božović, T. (2024). Sarajevo through the Lens of the Austrian-Hungarian Period: The Significance of Postcards in Tourism Promotion. *Journal of Tourism and Hospitality Management*, 10. 156-172. <https://doi.org/10.35666/25662880.2024.10.156>

Predmet ovog istraživanja je analiza austrougarskog perioda kao ključne faze u oblikovanju urbanog i turističkog identiteta Sarajeva. Autori ističu da su evropski mediji krajem 19. stoljeća redovno izveštavali o Sarajevu, prikazujući ga široj javnosti kao atraktivnu destinaciju. Poseban fokus stavljen je na razglednice, koje se intenzivnije koriste u Bosni i Hercegovini nakon 1890. godine. Ove vizualne publikacije dokumentuju arhitektonske promjene, kulturne lokalitete i svakodnevni život, te predstavljaju važan promotivni alat u povezivanju grada s evropskim posjetiocima. U geografskom obrazovanju analiza razglednica omogućava proučavanje prostorne reprezentacije kulturnih i urbanih elemenata, ranih oblika turističkog marketinga i razvoja vizuelnog identiteta grada kroz historijski kontekst.

9. Peštek, A., Banda, A., **Durmišević, B.**, Pilav-Velić, A., Rizvić, S. & Hadžijamaković, N. (2024). Virtual Reality: Enhancing Inclusive Tourism Experiences. *Journal of Tourism and Hospitality Management*, 10, 173-184. <https://doi.org/10.35666/25662880.2024.10.173>

Virtuelna realnost (VR) postaje sve značajnija u turizmu, omogućavajući korisnicima imerzivna iskustva i alternativni pregled destinacija. Ovo istraživanje se fokusira na praktične aspekte primjene VR tehnologije u promociji turizma i njen doprinos inkluzivnom turizmu, posebno osobama s invaliditetom i onima s ograničenjima u putovanju. Metodologija uključuje fokus grupe s predstavnicima privatnog, javnog i civilnog sektora, kroz koje su ispitane percepcije i potencijali

VR-a za povećanje pristupačnosti i prezentaciju prostora. Rezultati potvrđuju da VR može proširiti mogućnosti doživljaja turističkih prostora, olakšati planiranje putovanja i unaprijediti socijalnu inkluziju. U geografskom obrazovanju, primjena VR-a pruža inovativni alat za istraživanje prostornih karakteristika, kulturnih i prirodnih atrakcija, te razvoj strategija inkluzivnog turizma.

10. Avdić, B., **Durmišević, B.**, Žunić, L. (2024). Motivational Factors for Studying Geography: Student Perceptions in Sarajevo. *Geografski pregled*, 50, 75-89. <https://doi.org/10.35666/23038950.2024.75.09>

U kontekstu Univerziteta u Sarajevu, kao i cijele Bosne i Hercegovine, ovo istraživanje predstavlja prvi pokušaj sistematskog ispitivanja motivacija studenata za upis studija geografije i percepcije studenata o samoj nauci. Anketirana su 54 studenta prvog ciklusa, a pitanja su obuhvatila demografske karakteristike, prethodna iskustva s geografijom, razloge upisa, interesovanja unutar različitih geografskih područja i zadovoljstvo studijem. Deskriptivna analiza pokazuje raznolike motive i stavove, pri čemu se turizam ističe kao najprivlačnije područje interesa. Ovi nalazi naglašavaju važnost prilagođavanja nastavnog sadržaja savremenim interesovanjima studenata, kao i potencijal uključivanja praktičnih i primjenjivih elemenata geografskog obrazovanja, poput studija slučaja iz turizma, GIS tehnologija i održivog upravljanja prostorom, kako bi se osiguralo relevantno i motivirajuće učenje za buduće stručnjake u geografiji.

11. Peštek, A., Rizvić, S., Banda, A., Pilav-Velić, A., **Durmišević, B.** & Hadžijamaković, N. (2024). Virtual Reality and Promotion of Tourism Destinations: The Case of Federation of Bosnia and Herzegovina. *Interdisciplinary Management Research XX*, 568-587.

Tehnologija virtuelne realnosti (VR) predstavlja inovativan i perspektivan alat u razvoju turizma, omogućavajući imerzivna i prostorno orijentisana iskustva koja nadmašuju tradicionalne promotivne metode. U Bosni i Hercegovini primjena VR-a u turizmu je još u ranoj fazi, uglavnom kroz pojedinačne inicijative, dok prethodna istraživanja uglavnom analiziraju iskustvo korisnika i njihovu emotivnu povezanost s kulturnim i prostornim sadržajem. Ovaj rad, pored sistematskog pregleda literature, prikazuje nalaze fokus grupa s predstavnicima privatnog, javnog i civilnog sektora u Federaciji BiH, s ciljem istraživanja percepcija, potencijalnih modaliteta primjene i spremnosti za korištenje VR tehnologije u promociji turističkih destinacija. Studija naglašava značaj VR-a u geografskom obrazovanju i prostornom planiranju, jer omogućava vizualizaciju prostora, simulaciju prostorne dinamike i unapređenje kompetencija studenata i stručnjaka u interpretaciji i valorizaciji turističkih lokaliteta.

12. Peštek, A., Banda, A., Osmanović, M. & **Durmišević, B.** (2025). Tasting Tourism: Evaluating Gastro Offerings in Sarajevo and Mostar via Tripadvisor Reviews. *Turizam*, 3 (29) – u procesu publikacije.

U ovom radu su analizirane destinacije Sarajevo i Mostar kao najposjećenija gastronomska središta Bosne i Hercegovine, s posebnim fokusom na restorane koji nude tradicionalnu kuhinju. Istraživanje se temelji na analizi recenzija korisnika platforme TripAdvisor za 56 restorana u

Sarajevu i 21 restoran u Mostaru. Cilj studije je ocijeniti turističko zadovoljstvo lokalnom gastronomskom ponudom te identificirati prostorne i kulturne sličnosti i razlike u percepciji tradicionalnih jela između ove dvije urbane sredine. Rezultati pokazuju da turisti najviše vrednuju odnos kvalitete hrane i cijene, dok gastronomija obiju destinacija predstavlja važan segment bosanske kulinarske tradicije. Dobijeni nalazi pružaju relevantne informacije za prostorno planiranje turističkog razvoja, unapređenje lokalne gastronomije i strategije promocije u okviru održivog regionalnog razvoja.

13. Banda, A., Osmanović, M., **Durmišević, B.** & Zejnić, M. (2025). Turizam kao faktor fizionomske transformacije zaštićenih područja – studija slučaja Spomenik prirode Prokoško jezero, Zbornik radova Šestog kongresa geografa Bosne i Hercegovine, 54-70.

Rad istražuje utjecaj turizma na fizičku i prostornu transformaciju zaštićenih prirodnih područja, s posebnim osvrtom na Spomenik prirode Prokoško jezero. Primjenom GIS tehnologija i podataka Corine Land Cover analizirane su prostorne i vremenske promjene u pokrovnosti zemljišta, posebno u posljednje dvije decenije. Rezultati pokazuju negativne posljedice povećanog turističkog opterećenja i nelegalne gradnje, uključujući širenje rekreativnih zona, degradaciju staništa, gubitak biodiverziteta i narušavanje hidrološke stabilnosti jezera. Studija naglašava važnost održivog prostornog planiranja i upravljanja prirodnim resursima, preporučujući strožu regulaciju gradnje, efikasniji ekološki nadzor, unapređenje upravljanja otpadom i razvoj ekoturizma, čime se u kontekstu geografskog obrazovanja može promicati razumijevanje odnosa između turizma, prostora i okoliša.

14. Banda, A., **Durmišević, B.**, Osmanović, M., Musić, J. (2025). The Role of Virtual Reality in Experiencing Intangible Cultural Heritage: Case Study Sarajevo VRX Immersive Museum, Chapter 8. Extended Reality in Culture and Creative Industries, 175-195. Emerald Publishing Limited.

Autorice ovog poglavlja u knjizi Extended Reality in Culture and Creative Industries istražuju primjenu virtuelne realnosti (VR) u predstavljanju historijskih događaja kao dijela nematerijalnog kulturnog naslijeđa, s fokusom na sarajevski atentat na Franza Ferdinanda 1914. godine. Događaj je rekonstruisan kroz VR 360° 3D film u okviru Sarajevo VRX Immersive Museum, omogućavajući korisnicima interaktivno i edukativno iskustvo, koje uključuje prikaz austrougarskog urbanog prostora Sarajeva i geopolitičkih odnosa tog perioda. Cilj studije je ispitati kako VR iskustvo utiče na percepciju historijskih lokaliteta, razumijevanje prostornog i društvenog konteksta te formiranje budućih turističkih ponašanja, čime se ističe značaj savremenih tehnologija u geografskom i kulturnom obrazovanju.

### **2.3. Konferencijski sažeci i učešća na naučnim skupovima nakon izbora u prethodno zvanje**

1. Pobrić, A., Ajanović, E., Durmišević, B. & Osmanović, M. (2025). Tourism Potential of Počitelj and Political Challenges, Tourism Development of Sarajevo's Olympic Mountains. 11th International Tourism and Hospitality Management Congress, str. 22, Sarajevo.

2. Banda, A., Peštek, A., **Durmišević, B.**, Ajanović, E. & Osmanović, M. (2025). Between Tradition and Tourism: The Role of Bjelašnica's Cultural Heritage in Shaping the Tourism Supply. Book of abstracts 11th International Tourism and Hospitality Management Congress, str. 25.
3. Banda, A., Čaušević, A., Osmanović, M. & **Durmišević, B.** (2025). Tourism Development of Sarajevo's Olympic Mountains. Book of abstracts 11th International Tourism and Hospitality Management Congress, str. 36.
4. Nezirović, S. & **Durmišević, B.** (2023). Analiza prostornog razmještaja stanovništva Bosne i Hercegovine, Demographic Challenges in Bosnia and Herzegovina and the World - International Scientific Conference, str. 55, Sarajevo.
5. Pobrić, A., Osmanović, M. & **Durmišević, B.** (2023). Analiza savremenih demogeografskih trendova u općini Novi Grad Sarajevo, Demographic Challenges in Bosnia and Herzegovina and the World - International Scientific Conference, str. 60.

Kandidatkinja je također dostavila dokaze (certifikate) o učešću na ukupno 11 domaćih i međunarodnih naučnih skupova – devet sa radom i dva bez rada.

#### **2.4. Naučno-istraživački i stručni projekti nakon izbora u prethodno zvanje**

Kandidatkinja je učestvovala u realizaciji naučnoistraživačkog projekta pod nazivom 'Digitalne tehnologije i turizam: Uloga virtuelne realnosti u promociji i konkurentnosti turizma u Federaciji Bosne i Hercegovine', podržanog od strane Federalnog ministarstva za obrazovanje u nauku u periodu od 2023. do 2024. godine.

### **3. NASTAVNO-PEDAGOŠKI RAD**

Kandidatkinja je dostavila odvrjenu kopiju Odluke o izboru u zvanje asistentice za oblasti Regionalne geografije i Geografije u obrazovanju od 30. 03. 2022. godine, od kada sudjeluje u realizaciji nastave na studijskim smjerovima Odsjeka za geografiju Univerziteta u Sarajevu – Prirodno-matematički fakultet. To podrazumijeva izvođenje vježbi iz većeg broja nastavnih predmeta: Metodika nastave geografije, Didaktičko-metodička praksa iz geografije, Uvod u geografiju, Regije u prostornom planiranju, Regionalna geografija Evrope I, Regionalna geografija Evrope II, Savremeni regionalni razvoj Bosne i Hercegovine, Regionalna geografija Afrike, Savremeni problemi regionalnog razvoja u svijetu, Regionalna geografija Bosne i Hercegovine II, Uvod u naučno-istraživački rad, Geografska regionalizacija, Kartografija sa topografijom, Regionalna geografija Australije i Okeanije i Terenska nastava II, III i IV.

### **ZAKLJUČAK I PRIJEDLOG**

Na osnovu analize svih raspoloživih informacija u priloženoj dokumentaciji predviđenoj Konkursom, koju je dostavila Mr Belma Durmišević, asistentica, kao jedini kandidat u izboru saradnika u zvanje **višeg asistenta** za oblast **Geografije u obrazovanju**, na Univerzitetu u Sarajevu

– Prirodno-matematičkom fakultetu, Odsjeku za geografiju, te konsultujući Zakon o visokom obrazovanju i Statut Univerziteta u Sarajevu, Komisija je zaključila da kandidatkinja:

- ima akademsko zvanje magistricе geografije, koje je relevantno za oblast za koju se bira;
- provela je zakonom predviđeni period od skoro četiri godine u zvanju asistenta u istoj oblasti;
- studentica je treće godine doktorskog studija ‘Prirodne i matematičke nauke u obrazovanju – Geografija u obrazovanju’ na Univerzitetu u Sarajevu – Prirodno-matematički fakultet, sa odbranjenim projektom teme doktorske disertacije;
- u koautorstvu je objavila jedan praktikum i jednom poglavlje u knjizi, oboje nakon izbora u prethodno zvanje;
- u koautorstvu je objavila ukupno 14 recenziranih naučnih i stručnih radova, od čega dva prije izbora u prethodno zvanje, a 12 u toku posljednjeg izbornog perioda;
- učestvovala je na 11 naučnih konferencija, skupova, simpozija i radionica;
- učestvovala je u realizaciji jednog naučno-istraživačkog projekta;
- ima četverogodišnje nastavno iskustvo u radu na Univerzitetu u Sarajevu, kao asistentica na Odsjeku za geografiju Univerziteta u Sarajevu – Prirodno-matematičkog fakulteta.

**S obzirom na navedene činjenice, Komisija smatra da jedina prijavljena kandidatkinja – Mr Belma Durmišević, asistentica na Odsjeku za geografiju Univerziteta u Sarajevu – Prirodno-matematički fakultet, ispunjava sve uslove za izbor u zvanje VIŠEG ASISTENTA za oblast GEOGRAFIJA U OBRAZOVANJU, na Univerzitetu u Sarajevu – Prirodno-matematički fakultet, Odsjek za geografiju, a u skladu sa članom 176. Zakona o visokom obrazovanju (Službene novine Kantona Sarajevo, br. 36/22), i članom 96. stav b) Zakona o visokom obrazovanju Kantona Sarajevo (Službene novine Kantona Sarajevo, broj 33/17), članom 176. Zakona o visokom obrazovanju Kantona Sarajevo (Službene novine Kantona Sarajevo, br. 33/17, 35/20, 40/20, 39/21) i Statutom Univerziteta u Sarajevu. Na osnovu svega navedenog u Izvještaju, Komisija sa zadovoljstvom predlaže Vijeću Univerziteta u Sarajevu - Prirodno-matematički fakultet da izabere kandidata Mr Belmu Durmišević za SARADNIKA, u zvanje VIŠEG ASISTENTA za oblast GEOGRAFIJA U OBRAZOVANJU, na Univerzitetu u Sarajevu – Prirodno-matematički fakultet, Odsjek za geografiju, te da u vezi s tim nastavi zakonom predviđenu proceduru do okončanja postupka.**

Sarajevo, Zagreb, 15. 12. 2025. godine

---

doc. dr. Boris Avdić, predsjednik

---

prof. dr. Zoran Curić, član

---

prof. dr. Ranko Mirić, član